

- मुख्यमंत्री अशोक गहलोत री नुवी दिल्ली मांय कांग्रेस प्रमुख सोनिया गांधी ऊं मुलाकात-लारला दिनां व्ह्या घटनाक्रम माथै माफी मांगी-श्री गहलोत साफ कर्यो कै वे कांग्रेस अध्यक्ष ओहदा रो चुनाव नी लड़ेला।
- प्रधानमंत्री नरेन्द्र मोदी गुजरात रा भावनगर अर सूरत मांय न्यारी-न्यारी परियोजनावां रो उद्घाटन कर्यो अर नींव धरी- श्री मोदी आज सिज्या अहमदाबाद मांय 36वां राष्ट्रीय खेलां रो उद्घाटन करेला।
- सुप्रीम कोर्ट रो फैसलो-सगळी महिलावां ने हिफाजती अर कानूनी रूप ऊं गर्भपात रो हक-ब्याहता अर बिन ब्याहता रे बीचै भेद करणो गैर संवैधानिक।
- प्रदेश मांय राजीव गांधी ग्रामीण ओलम्पिक खेल होड रा थर रा मुकाबला सरू।
- प्रदेश मांय मानसून री बिरखा रो दौर थमणे रे साथै ही तापमान मांय बढवार।

000

मुख्यमंत्री अशोक गहलोत आज नुवी दिल्ली मांय कांग्रेस प्रमुख सोनिया गांधी ऊं मिल्या। दोन्यू नेतावां रे बीचै कोई एक घंटा ताई बतळ व्ही। बतळ रे पछै मीडिया सामी बोलता श्री गहलोत क्यो कै 25 सितम्बर ने राज्य मांय व्ह्यो घटनाक्रम दुर्भागजोग है। वणा क्यो कै वे सदन रा नेता होवण रे बावजूद एक लैण रो प्रस्ताव मंजूर नी कर्या सव्या। इण रो वां ने दुःख रेहवेला। वणा क्यो कै ई घटनाक्रम ने ले र सोनिया गांधी ऊं माफी मांगी है। श्री गहलोत साफ कर्यो कै वे कांग्रेस अध्यक्ष ओहदा रो चुनाव नी लड़ेला।

.....

इण ऊं पैला आज दिल्ली मांय ई श्री गहलोत कांग्रेस रा केई ठावा नेतावां ऊं मिल्या। आज कांग्रेस अध्यक्ष ओहदा ने ले र दिल्ली मांय आखा दिन हलचल री। उठी ने राज्य रा पैली रा उप मुख्यमंत्री सचिन पायलट ई दिल्ली मांय है। वां री आज सिज्या सोनिया गांधी ऊं मुलाकात व्हे सके है। अठी ने आज जयपुर मांय एक-दूजा माथै आरोप मांडण रो दौर धीमो पड्यो। राज्य रा केई नेता आ दिनां दिल्ली मांय डेरो डाल्या है।

000

प्रधानमंत्री नरेन्द्र मोदी क्यो है कै आत्मनिर्भर भारत बणावण मांय भावनगर बंदरगाह मोटी भूमिका निभावेला। वणा क्यो कै गोदामां, परिवहन अर माल ढोवण रा कारोबार रा पसारा ऊं भावनगर मांय रूजगार रा हजारू मौका मुहैया व्हेला। प्रधानमंत्री भावनगर मांय अमरेली, भावनगर अर बोताड़ जिला मांय पांच हजार दो सौ करोड़ रिप्या ऊं बत्ती बुनियादी ढांचा ऊं जुडी न्यारी-न्यारी परियोजनावां री नींव धरी अर उद्घाटन कर्यो अर आं परियोजनावां मांय दुनिया रा पैला सीएनजी टर्मिनल री नींव धरण अर भावनगर मांय क्षेत्रीय विज्ञान केंद्र रा उद्घाटन करण रो कार्यक्रम है। इण ऊं पैला प्रधानमंत्री भावनगर मांय दो किलोमीटर लम्बो रोड शो कर्यो। ई मौके हजारों लोग सड़क रे सारे ऊबा व्हेर प्रधानमंत्री रो स्वागत कर्यो। प्रधानमंत्री संवारा सूरत मांय तीन हजार चार सौ करोड़ रिप्या ऊं बत्ती री न्यारी-न्यारी परियोजनावां री नींव धरी अर कुछ परियोजनावां ने देश ने समर्पित करया। 36वां राष्ट्रीय खेल गुरुवार उं गुजरात रा अहमदाबाद मांय सरू व्हे रिया है। आं खेलां मांय भाग लेवण सारू राजस्थान रा 65 खिलाड़ियां रो दळ अहमदाबाद गयो है। राष्ट्रीय खेल गुजरात मांय पैली बार व्हे रिया है। अ खेल आज ऊं 12 अक्टूबर ताई चालेला। देशभर ऊं कोई 15 हजार खिलाड़ी, कोच अद दूजा अहलकार 36 खेल होडां मांय हिस्सो लेवेला। खेल होडां रो आयोजन अहमदाबाद, गांधीनगर, सूरत, वडोदरा, राजकोट अर भावनगर मांय कर्यो जाएला।

प्रधानमंत्री काले सिज्या अम्बाजी मांय 7 हजार 200 करोड़ रिप्या ऊं बत्ती री विकास परियोजनावां री नींव धरेला अर लोकार्पण करेला। श्री मोदी वेस्टर्न डेडिकेटेड फ्रेट कॉरिडोर रा 62 किलोमीटर लम्बा न्यू पालनपुर-न्यू महेसाणा सेक्शन अर 13 किलोमीटर लम्बा न्यू पालनपुर-न्यू चटोदर सेक्शन ने ई राष्ट्र ने समर्पित करेला। प्रधानमंत्री अम्बाजी मांय कार्यक्रम रे पछै आबूरोड़ पहुंचेला अर मानपुर हवाई पट्टी ऊं अहमदाबाद सारू रवाना व्हेला। प्रधानमंत्री रे राजस्थान री सीमा मांय प्रवेश करण ऊं ले र मानपुर हवाई पट्टी ताई शानदार स्वागत कर्यो जाएला। श्री मोदी हवाई पट्टी माथै प्रदेश ओहदादारां अर उठा रा सांसद अर विधायकां ऊं मिलेला।

000

.....

000

सुप्रीम कोर्ट फैसलो दियो है कै सगळी महिलावां ने हिफाजती अर कानूनी रूप उं गर्भपात रो हक है अर ई मामला मांय ब्याहता अर बिन ब्याहता महिलावां रे बीचे भेद करणो गैर असंवैधानिक है। शीर्ष कोर्ट कह्यो कै बिन ब्याहता महिला ने ई सहमति उं बण्या संबंदा उं पैदा 20 उं 24 हप्ता रा भ्रूण रो गर्भपात करावण रो हक है। न्यायाधीश न्यायमूर्ति डी वाई चन्द्रचूड री सदरत मांय तीन न्यायाधीशां री पीठ ओ ई फैसलो दियो कै चिकित्सीय गर्भपात अधिनियम रै तैत दुष्कर्म री व्याख्या मांय वैवाहिक दुष्कर्म ने ई भेळो करणो चाहिजे। सुप्रीम कोर्ट रो ओ ई कहणो है कै एक ब्याहता महिला ने गर्भपात रा हक ने काम मांय लेवण उं रोक्यो नी जा सके।

000

राज्यसभा सांसद अर भाजपा रा राष्ट्रीय प्रवक्ता सुधांशु त्रिवेदी आज चित्तौड़गढ़ रो दौरा कर्यो। मीडिया साथै बतळ मांय वणा कयो कै प्रधानमंत्री नरेंद्र मोदी देश ने आगे बधावण रा काम मांय लाग्या है अर महंगाई माथै काबू कर्यो जा रियो है। वणा कयो कै यूरोप अर अमेरिका समेत केई देशां मांय महंगाई बधी है, फेरु ई वण रे मुकाबले भारत मांय महंगाई कम रेट माथै बधी है। वणा कयो कै कांग्रेस मांय भ्रष्टाचार अर परिवारवाद रा बोलबाला है, जो पार्टी ने नीचे ले जा रिया है। श्री त्रिवेदी कयो राजस्थान मांय चुनाव वर्तमान कांग्रेस सरकार री नाकामियां ने लेर लड्यो जाएला।

000

प्रदेश मांय राजीव गांधी ग्रामीण ओलम्पिक खेल होड रा जिला थर रा मुकाबला आज उं सरु व्ह्या। मुख्य सचिव ऊषा शर्मा जैपर मांय सवाईमानसिंह स्टेडियम मांय जिला थर री होड री सरुआत करी। जिला कलेक्टर प्रकाश राजपुरोहित बतायो कै जयपुर जिला उं ग्रामीण ओलम्पिक खेलां सारु 70 हजार खिलाडियां नाम मंडायो। बूंदी मांय युवा मामलात अर खेल राज्य मंत्री अशोक चांदना खेल संकुल मांय होड रो उद्घाटन कर्यो। वणा ब्लॉक थर माथै जीतण वाळी टीमां रा गांवां मांय खेल मैदानां सारु 25-25 लाख रिपया देवण रो ऐलाण करयो। चित्तौड़गढ़ मांय राजस्थान धरोहर अर प्रोन्नति प्राधिकरण रा अध्यक्ष सुरेन्द्र सिंह जाड़ावत इंदिरा गांधी स्टेडियम जिला थर रा ओलम्पिक खेलां री सरुआत करी। नागौर मांय जिला प्रमुख भागीरथ राम चौधरी, बांसवाडा मांय जनजाति विकास राज्य मंत्री अर्जुन सिंह बामणिया, बीकानेर मांय जिला प्रमुख मोडाराम मेघवाल, श्रीगंगानगर मांय विधायक गुरमीत सिंह कुन्नर अर राजकुमार गौड़ री मौजूदगी मांय जिला थर री आं होडां सरु व्ही। दौसा मांय ममता भूपेश अर मुरारीलाल मीणा खेलां रा उद्घाटन जळसा मांय हिस्सो लियो। करौली, सवाईमाधोपुर, भरतपुर अर डूंगरपुर मांय ई जळसा पूरण आं खेलां री सरुआत व्ही।

000

प्रदेश मांय मानसूनी बिरखा रो दौर थमण रे साथै ई तापमान मांय अचाणचक बढवार व्ही है। मौसम महकमा मुजब लारला चौबीस घंटा मांय सब उं बत्ती 37 दशमलव 6 डिग्री सैलिसयस तापमान बीकानेर मांय दर्ज करी ज्यो। धौलपुर अर टोंक मांय ई पारो 37 डिग्री सैलिसयस उं ऊपर पहुंच्यो। प्रदेश रा दूजी ठोडां ई तापमान 32 उं 36 डिग्री सैलिसयस रे बीचे दर्ज करी ज्यो। ई बीचे प्रदेश मांय कुछ ठोडां बावडता मानसून री बिरखा व्ही है। सिरौही, चित्तौड़गढ़, भीलवाडा, बांसवाडा जिला अर आरे-सारे रा हलका मांय छुटपुट बिरखा व्ही। मौसम महकमो आज अजमेर, टोंक, जयपुर, सीकर, दौसा, करौली, बूंदी, नागौर, सीकर, सवाईमाधोपुर जिला मांय कठे-ई-कठे हल्का दर्जा री बिरखा री आस जतायी है।

000